



Sastanak parlamentarnog vojnog povjerenika BiH i predsjedavajućeg Zajedničke komisije za odbranu i sigurnost BiH s delegacijom Rumunije

Predsjedavajući Zajedničke komisije za odbranu i sigurnost BiH Sifet Podžić i parlamentarni vojni povjerenik BiH Boško Šiljegović održali su 30.5.2016. sastanak s državnom sekretarkom Ministarstva odbrane Rumunije Otiliom Savom.

Rumunska delegacija, koju su, osim državne sekretarke, činili i ambasador Rumunije u BiH Filip Todorescu, vojni ataše Rumunije u našoj zemlji brigadir Valentin Voaides i njegov saradnik brigadir Renato Nadolu, upoznala je domaćine sa zakonskim rješenjima kojima se u Rumuniji reguliraju statusna pitanja veterana u oružanim snagama, kao i angažman supružnika stradalih pripadnika vojnih jedinica u okviru Ministarstva odbrane Rumunije. Državna sekretarka Otilia Sava navela je da u Rumuniji postoji posebno zakonsko rješenje kojim se regulira školovanje djece i rješavaju slična statusna pitanja pripadnika rumunskih oružanih snaga stradalih tokom učešća u mirovnim misijama u inozemstvu.

Podžić i Šiljegović upoznali su goste s najvažnijim segmentima demokratske kontrole institucija odbrane i sigurnosti u našoj zemlji. Naveli su da je Bosna i Hercegovina jedina u regionu institucionalizirala zaštitu ljudskih prava i osnovnih sloboda pripadnika Oružanih snaga BiH kroz postojanje Ureda parlamentarnog vojnog povjerenika BiH. Uručujući gostima iz Rumunije primjerak Izvještaja o radu parlamentarnog vojnog povjerenika BiH za 2015. godinu, koji je ranije usvojen na sjednicama oba doma Parlamentarne skupštine BiH, Podžić i Šiljegović posebno su naglasili oblasti u kojima je evidentirano kršenje elementarnih ljudskih prava vojnih lica i kadeta u Oružanim snagama BiH.

Državna sekretarka Ministarstva odbrane Rumunije dala je snažnu podršku institucijama Bosne i Hercegovine na njihovom putu ka euroatlantskim integracijama, te istakla potrebu uspostavljanja bliske saradnje parlamenata Bosne i Hercegovine i Rumunije, posebno parlamentarnih radnih tijela koja se bave demokratskom kontrolom odbrambeno - sigurnosnog sektora u ovim državama. S tim u vezi, pozvala je članove Zajedničke komisije za odbranu i sigurnost BiH i parlamentarnog vojnog povjerenika BiH da posjete Parlament Rumunije s ciljem razmjene pozitivnih praksi u parlamentarnom nadzoru sistema sigurnosti i odbrane Bosne i Hercegovine i Rumunije.